

KEMENTERIAN KEWANGAN DAN EKONOMI
PEMBENTANGAN KERTAS CADANGAN
RANG UNDANG-UNDANG (2022) PERBEKALAN 2022/2023
MAJLIS MESYUARAT NEGARA 2022

Bismillah Hirrahman Nirrahim

Alhamdulillah Hir-Rabbil 'Alamin

Was-salatuWas-salamu 'Ala Ash-rafil Anbiya E-wal-mur-salin

Sayyidina Muhammadin Wa'ala AA-lihi

Wasah-bihi Ajma'in

Assalamualaikum Warahmatullahi Wabarakatuh

Rabbish-rahli Sodri Wayas-sirli Amri Wah-lul 'Ukdatam-min-lisani

Yaf-kahu-kauli

**Yang Berhormat Yang Di-Pertua Dewan dan Ahli-Ahli Yang
Berhormat,**

1. Tujuan Rang Undang-Undang ini adalah **“Untuk membenarkan bagi pengeluaran, sejumlah Lima *point* Tujuh Billion Dollar Brunei (B\$5,700,000,000) dari Kumpulan Wang Yang Disatukan, bagi perkhidmatan Tahun Kewangan 2022/2023, dan untuk memperuntukannya, bagi maksud-maksud yang dinyatakan dalam Jadual”**.

2. Dalam berbuat demikian, kaola memohon izin untuk menerangkan secara ringkas mengenai dengan sokongan Anggaran Belanjawan Negara berdasarkan kepada analisa dan penilaian seperti kemampuan kewangan Kerajaan dan keutamaan perbelanjaan Kerajaan sebagai asas dalam menyediakan Rang Belanjawan Negara Tahun Kewangan 2022/2023. Ini termasuklah prospek ekonomi global dan Negara Brunei Darussalam.
3. Alhamdulillah, Syukur kita panjatkan kehadiran Allah Subhanahu Wata'ala kerana dengan izin dan limpah rahmatNya jua, serta berkat kepimpinan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam, rakyat dan penduduk di Negara ini dapat menikmati keamanan dan kesejahteraan di sebalik berbagai cabaran yang dihadapi pada masa ini.
4. Dalam kesempatan ini juga, kaola bagi pihak Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, ingin merakamkan penghargaan dan ribuan terima kasih khususnya kepada para barisan hadapan termasuk sukarelawan-sukarelawan dan agensi-agensi keselamatan baik di sektor awam mahupun sektor swasta di atas khidmat

bakti dan pengorbanan yang telah dihulurkan demi memastikan Negara dan semua lapisan masyarakat terselamat dan terpelihara daripada kesan penularan wabak COVID-19 ini.

5. Pandemik COVID-19 telah mengubah lanskap sesebuah ekonomi, termasuk Negara Brunei Darussalam di mana kesannya telah menjejaskan aktiviti-aktiviti sosial dan perekonomian disebabkan oleh sekatan pergerakan yang dilaksanakan sejak gelombang pertama dan kedua dalam usaha untuk membendung penularan wabak berkenaan.
6. Di samping kesan yang kita hadapi dalam negara, rantaian bekalan global juga turut terkesan disebabkan oleh sekatan pergerakan yang telah menjejaskan pengeluaran negara-negara pembekal dimana permintaan pengguna tidak dapat dipenuhi khususnya sektor-sektor ekonomi yang bergantung kepada sumber dari luar negara.
7. Untuk menangani penularan wabak di Negara ini, Kerajaan telah mempertingkatkan lagi Program Vaksinasi Kebangsaan yang telah bermula pada 3 haribulan April 2021. Alhamdulillah setakat ini lebih dari 94 peratus Rakyat dan Penduduk di Negara ini telah menerima suntikan, sekaligus membolehkan Negara mengisytiharkan tahap endemik pada

15 haribulan Disember 2021. Di mana dengan fasa endemik ini, orang ramai dapat menjalani semula aktiviti-aktiviti harian seperti biasa dengan mengamalkan *Standard Operating Procedures* dan Garis Panduan Fasa Awal Endemik yang telah ditetapkan oleh Kementerian Kesihatan.

8. Untuk mencapai program tersebut, beberapa tindakan telah diambil seperti berikut:

- i. Pertama, perkhidmatan klinik vaksinasi bergerak khusus kepada penduduk-penduduk luar bandar dan mereka yang kurang upaya;
- ii. Kedua, Program Vaksinasi Remaja iaitu bagi remaja yang berumur 12 hingga 17 tahun yang telah bermula pada 8 haribulan November 2021; dan
- iii. Ketiga, pemberian dos penggalak (*Booster Dose*) kepada orang ramai berumur 18 tahun ke atas dan yang telah melengkapkan 2 dos vaksinasi.

Yang Berhormat Yang Di-Pertua Dewan dan Ahli-Ahli Yang Berhormat,

9. Lanskap ekonomi dunia adalah masih tidak menentu disebabkan oleh penularan COVID-19. Hala tuju pemulihan ekonomi masih tidak dapat dijangkakan walaupun dengan adanya vaksin dan program vaksinasi yang dilaksanakan oleh seluruh negara di dunia namun kebimbangan terhadap munculnya varian-varian baru telah menjejaskan pergerakan perjalanan sekaligus menjejaskan pemulihan ekonomi bagi sesebuah negara.
10. Ekonomi dunia telah merudum pada awal permulaan penularan COVID-19 iaitu pada tahun 2020 akibat dari pelaksanaan “the great lockdown” sebagai langkah pembendungan penularan COVID-19. Pertumbuhan ekonomi dunia telah mencatatkan penurunan sebanyak negatif 3.1 peratus, berikutan penutupan beberapa sektor ekonomi dalam usaha untuk membendung penularan wabak berkenaan dan ini diikuti oleh peningkatan pengangguran yang membawa kesan negatif terutama sekali kepada sektor-sektor penerbangan dan hospitaliti. Pada masa yang sama, negara pengeksport minyak juga berhadapan dengan beberapa cabaran seperti kejatuhan harga minyak global, dan kemerosotan permintaan dalam pasaran terhadap bahan api fosil. Di samping itu, ini telah mendorong komitmen beberapa negara kepada *decarbonisation* atau *green recovery* dan perubahan teknologi hijau yang meluas secara beransur-

ansur telah menjadikan *renewable energies* sebagai tenaga pilihan.

11. Kemunculan varian Delta pada tahun 2021 telah menjejaskan momentum pemulihan ekonomi global. Walaubagaimanapun penyesuaian kepada norma baharu dan sokongan atau *stimulus* berterusan dalam beberapa ekonomi besar telah membolehkan ekonomi global kembali pulih ataupun *rebound* dan dalam laporan World Economic Outlook atau WEO keluaran bulan Oktober 2021, pihak International Monetary Fund (IMF) telah meramalkan pertumbuhan ekonomi global akan meningkat sebanyak 4.9 peratus bagi tahun 2022. Walaubagaimanapun, berikutan kemunculan varian baru Omicron serta gangguan rantai bekalan global yang berlanjutan, pihak IMF dalam laporan WEO keluaran bulan Januari 2022 telah menurunkan unjuran pertumbuhan ekonomi global bagi tahun 2022 kepada kadar 4.4 peratus. Dalam pada itu, pertumbuhan ekonomi di rantau Asia pula khususnya bagi *Emerging and Developing Asia* (China, India & ASEAN-5) bagi tahun 2022 adalah diunjurkan 5.9 peratus dalam laporan WEO IMF keluaran bulan Januari 2022 berbanding dengan 6.3 peratus dalam laporan WEO IMF keluaran bulan Oktober 2021.

12. Pihak IMF juga meramalkan bahawa jumlah perdagangan global (*global trade volume*) akan berkembang pada kadar 6 peratus pada tahun 2022 berbanding dengan 9.3 peratus pada tahun 2021.
13. Pihak agensi *Energy Information Administration* (EIA) melalui laporan bulan Januari 2022 telah meramalkan bahawa harga minyak Brent akan meningkat secara purata dari \$71 US Dollar setong pada tahun 2021 kepada \$75 US Dollar setong pada tahun 2022. Kenaikan harga minyak ini adalah didorong oleh kadar pengeluaran minyak yang tidak dapat memenuhi permintaan, dimana peningkatan penggunaan petroleum dan bahan api cecair global secara purata sebanyak 3.6 juta tong sehari daripada 96.9 juta tong sehari pada tahun 2021 kepada 100.5 juta tong sehari bagi tahun 2022.

Yang Berhormat Yang Di-Pertua Dewan dan Ahli-Ahli Yang Berhormat,

14. Seterusnya kaola ingin mengongsikan prestasi ekonomi negara. Pada tahun 2020, Sektor Minyak dan Gas Negara telah turut terkesan berikutan penurunan permintaan minyak global. Walaupun demikian, ekonomi Negara secara keseluruhannya telah merekodkan pertumbuhan positif dalam tahun 2020 iaitu pada kadar 1.1 peratus berikutan

pertumbuhan yang kukuh dari Sektor Bukan Minyak dan Gas. Pertumbuhan ini adalah disebabkan oleh meningkatnya aktiviti hiliran Sektor Pengeluaran Produk Petroleum dan Kimia dan Sektor Perikanan.

15. Bagi Suku Ketiga (Q3) tahun 2021, Keluaran Dalam Negara Kasar Negara Brunei Darussalam telah menurun sebanyak 2.2 peratus berbanding suku ketiga tahun 2020. Ini adalah disebabkan oleh penurunan pengeluaran minyak mentah kepada 97.1 ribu tong sehari pada suku ketiga tahun 2021 berbanding 100.6 ribu tong sehari pada suku ketiga tahun 2020, dan pengeluaran gas asli sebanyak 750.9 ribu mmbtu sehari pada suku ketiga tahun 2021 berbanding 834.5 ribu mmbtu sehari pada suku ketiga tahun 2020, yang disebabkan oleh sekatan pergerakan yang sebahagiannya menyebabkan terjejasnya aktiviti-aktiviti penyelenggaraan telaga-telaga minyak termasuk *Well, Reservoir and Facilities Management*.
16. Walaubagaimanapun, penurunan ini diimbangi oleh perkembangan yang positif dari Sektor Bukan Minyak dan Gas sebanyak 1.0 peratus pada suku ketiga tahun 2021 berbanding dengan suku ketiga tahun 2020. Perkembangan positif ini adalah didorong oleh meningkatnya pengeluaran dari Sektor Pertanian, Perhutanan dan Perikanan pada kadar 27.9 peratus disebabkan oleh peningkatan pengeluaran dari

subsektor sayur-sayuran, buah-buahan dan lain-lain hasil pertanian, subsektor perikanan, dan subsektor makanan ternakan.

17. Di samping itu, terdapat jua subsektor lain yang turut menyumbang kepada perkembangan yang positif seperti subsektor Pengangkutan Udara; subsektor Kewangan; subsektor Perhubungan; dan subsektor perkhidmatan Kesihatan.
18. Pihak International Monetary Fund (IMF), ASEAN Plus 3 Macroeconomic Research Office (AMRO) dan Asian Development Bank (ADB) pula telah mengunjurkan pertumbuhan ekonomi yang positif bagi Negara Brunei Darussalam pada tahun 2022 masing-masing pada kadar 2.6 peratus, 3.5 peratus; dan 3.2 peratus. Alhamdulillah, ini adalah dengan mengambilkira usaha-usaha pemulihan dan pengukuhan ekonomi yang dilaksanakan khususnya pengeluaran produk industri hiliran minyak dan gas serta aktiviti-aktiviti berkaitan dari Syarikat Hengyi Industries Sdn Bhd dan kilang Syarikat Brunei Fertilizer Industries Sdn Bhd (BFI).
19. Namun demikian, perkembangan positif ini berkemungkinan dilembapkan oleh situasi inflasi global yang semakin

meningkat berpunca dari rangkaian bekalan barangan global ataupun *global supply chain* yang telah terjejas akibat COVID-19. Kadar inflasi negara pada tahun 2020 adalah 1.9 peratus dan pada kadar 1.7 peratus setakat bulan November tahun 2021. Situasi ini amat berbeza sebelum pandemik COVID-19 melanda dunia, yang mana kadar inflasi negara ini adalah di tahap minima.

20. Kadar inflasi global yang meningkat telah menjejaskan bukan sahaja pengguna di negara ini tetapi juga syarikat pengeluar, memandangkan negara amat bergantung kepada produk-produk impot termasuk barangan penggunaan (*consumer goods*) dan barangan perantaraan (*intermediate goods*) yang digunakan sebagai *input* kepada pengeluaran produk tempatan. Penyebab utama kadar inflasi global adalah kos logistik dan pengangkutan yang melonjak naik dan kos bahan mentah yang turut meningkat. Menurut Freightos Baltic Index Global Container Freight Indeks, kos pengangkutan bagi kontena global telah meningkat secara mendadak daripada bulan Julai 2019 yang berjumlah \$1,342 US Dollar bagi kontena berukuran 40 kaki kepada \$9,806 US Dollar pada bulan Januari 2022 iaitu sekurang-kurangnya enam (6) kali ganda kenaikan. Ini ditambah lagi dengan kesesakan di pelabuhan-pelabuhan utama dunia yang menyebabkan kelambatan dalam penghantaran barangan.

21. Kadar inflasi tinggi yang dialami di seluruh dunia ini adalah satu perkara yang di luar kawalan negara ini. Ianya bukan sahaja menjejaskan sektor-sektor perindustrian di seluruh dunia tetapi juga kualiti kehidupan dengan meningkatnya kos kehidupan seharian. Dalam hubungan ini, Kementerian Kewangan dan Ekonomi sentiasa memantau dan meneliti impak inflasi global ini kepada ekonomi Negara.

Yang Berhormat Yang Di-Pertua Dewan dan Ahli-Ahli Yang Berhormat,

22. Izinkan kaola mengongsikan kedudukan fiskal Kerajaan bagi Tahun Kewangan 2020/2021. Kutipan hasil pendapatan Kerajaan adalah menurun sebanyak 57.7 peratus kepada \$2.05 bilion berbanding dengan Tahun Kewangan 2019/2020 (\$4.85 bilion). Manakala, perbelanjaan sebenar Kerajaan adalah menurun sebanyak 9.9 peratus kepada \$5.29 bilion berbanding dengan Tahun Kewangan 2019/2020 (\$5.87 bilion). Oleh yang demikian, Kerajaan telah merekodkan defisit berjumlah \$3.24 bilion bagi Tahun Kewangan 2020/2021. Ini merupakan defisit yang tertinggi sejak Negara mengalami defisit pada Tahun Kewangan 2014/2015. Ini adalah sebahagian besarnya disebabkan oleh harga minyak dunia yang berada di paras yang rendah sehingga ada ketikanya berada pada kadar \$20 US Dollar setong, dan

secara purata adalah pada kadar \$42 US Dollar setong pada tahun 2020. Dalam masa yang sama, pengeluaran minyak mentah dan LNG domestik juga menurun berikutan penangguhan dan kerja-kerja pemulihan yang tidak dirancang (*unscheduled deferrals and maintenance*) ke atas telaga-telaga minyak.

23. Seterusnya, kaola ingin mengongsikan kedudukan fiskal Kerajaan yang dikemaskini bagi Tahun Kewangan 2021/2022. Alhamdulillah, berikutan dengan kenaikan harga minyak dunia yang mencecah melebihi \$90 US dollar setong, unjuran hasil pendapatan Kerajaan bagi Tahun Kewangan 2021/2022 adalah dikemaskini kepada \$4.15 billion berbanding \$2.05 billion dalam Tahun Kewangan 2020/2021.
24. Manakala, perbelanjaan Kerajaan bagi Tahun Kewangan 2021/2022 adalah diunjurkan meningkat kepada \$5.67 billion berbanding dengan \$5.29 billion dalam Tahun Kewangan 2020/2021. Peningkatan ini sebahagian besarnya adalah disebabkan oleh komitmen perbelanjaan Kerajaan dari bulan Ogos 2021 berikutan dengan gelombang kedua wabak COVID-19, di mana setakat 24 haribulan Februari 2022, Kerajaan telah membelanjakan sejumlah \$138.5 juta, untuk membiayai perkara-perkara berikut:

- 24.1 Untuk meningkatkan kapasiti ujian makmal SARS-CoV-2 kepada 8,000 ujian sehari, dimana Brunei COVID-19 AirLab telah mula beroperasi sejak 19 haribulan Ogos 2021;
- 24.2 Pemberian Elaun Khas kepada para barisan hadapan termasuk doktor, jururawat, paramedik, pemandu ambulans, sukarelawan, pembersih, penjaga keselamatan dan kesemua yang bertugas dengan Kementerian Kesihatan, di Pusat Pengasingan Kebangsaan Tutong dan di pusat-pusat kuarantin, serta pusat-pusat vaksinasi.
- 24.3 Pembelian vaksin termasuk melalui COVID-19 Global Vaccine Access Facility ataupun COVAX.
- 24.4 Perbelanjaan bagi menambah Pusat Pengasingan Kebangsaan secara sementara bagi kes-kes yang tidak kritikal di Bangunan Program Khidmat Bakti Negara (PKBN) di Daerah Temburong; Kampus Ma'had Islam Brunei dan Sekolah Menengah Sufri Bolkiah di Daerah Tutong; Batalion Ketiga Kem Lumut dan Pusat Tingkatan Enam (PTE) di Daerah Belait.

- 24.5 Perbelanjaan untuk melaksanakan Sistem Pengurusan Vaksin dan Fasa Ketiga Sistem Aplikasi BruHealth; dan untuk menambah kapasiti sistem BruHealth dan pelaksanaan BruHealth Disaster Recovery Site;
 - 24.6 Perbelanjaan untuk membekal makanan (*ration*) kepada individu yang menjalani pengasingan diri di pusat-pusat pengasingan dan tempat kediaman sendiri; dan
 - 24.7 Perbelanjaan untuk membeli Antigen-Rapid Test khusus untuk kegunaan Kementerian-Kementerian dan Jabatan-Jabatan Kerajaan termasuk sekolah-sekolah dan institusi-institusi pengajian tinggi.
25. Oleh yang demikian, berasaskan kepada anggaran kutipan hasil dan perbelanjaan seperti yang kaola kongsiikan sebentar tadi, Kerajaan dijangka akan merekodkan defisit belanjawan sebanyak \$1.52 billion dalam Tahun Kewangan 2021/2022 berbanding dengan \$3.24 billion dalam Tahun Kewangan 2020/2021.

Yang Berhormat Yang Di-Pertua Dewan dan Ahli-Ahli Yang Berhormat,

26. Seterusnya kaola sukacita mengongsikan Anggaran Hasil Kerajaan bagi Tahun Kewangan 2022/2023 yang diunjurkan berjumlah **Tiga *Point* Satu Tujuh Billion Dollar Brunei** (B\$3.17 billion). Dimana **Dua *Point* Dua Lima Billion Dollar Brunei** (B\$2.25 billion) adalah dari hasil Sektor Minyak dan Gas; dan **Sembilan Ratus Dua-Puluh Tiga Juta Dollar Brunei** (B\$923 juta) adalah hasil dari Sektor Bukan Minyak dan Gas. Pecahan hasil-hasil tersebut adalah antaranya seperti berikut:

26.1 Kutipan hasil Cukai-Cukai yang keseluruhannya berjumlah \$314.60 juta;

26.2 Hasil dari Yuran, Caj dan Sewa yang keseluruhannya berjumlah \$311.36 juta;

26.3 Hasil Pulangan Pelaburan dan Simpanan sebanyak \$236.28 juta; dan

26.4 Hasil yang berlebihan dari Badan-Badan Berkanun sebanyak \$40.49 juta.

27. Dari segi perbelanjaan, sejumlah **Lima *Point* Tujuh Billion Dollar Brunei** (B\$5.7 billion) adalah dicadangkan untuk membiayai perbelanjaan Kementerian-Kementerian dan Jabatan-Jabatan Kerajaan seperti berikut:

27.1 **Dua Point Satu Lima Billion Dollar Brunei** (B\$2.15 billion) untuk membiayai Gaji Kakitangan termasuk gaji, elaun-elaun dan pembayaran caruman;

27.2 **Dua Point Satu Empat Billion Dollar Brunei** (B\$2.14 billion) adalah untuk membiayai Perbelanjaan Berulang-Ulang;

27.3 **Tiga Ratus Lima Puluh Juta Dollar Brunei** (B\$350 juta) adalah untuk membiayai projek-projek Rancangan Kemajuan Negara; dan

27.4 Selebihnya adalah untuk membiayai perbelanjaan di bawah tajuk **Perbelanjaan Yang Di-Akui**.

28. Oleh itu, berdasarkan Anggaran Hasil dan Perbelanjaan yang kaola nyatakan tadi, maka Kerajaan akan mengalami defisit belanjawan berjumlah kira-kira **Dua Point Lima Tiga Billion Dollar Brunei (B\$2.53 billion)**. Unjuran defisit ini akan dikemaskini dari masa ke semasa berdasarkan kepada tahap pengeluaran minyak dan gas Negara, harga minyak dunia, kadar pertukaran matawang Dollar Amerika Syarikat, dan hasil pendapatan dari Sektor Bukan Minyak dan Gas.

Yang Berhormat Yang Di-Pertua Dewan dan Ahli-Ahli Yang Berhormat,

29. Kaola akan beralih kepada Tema Belanjawan Negara bagi Tahun Kewangan 2022/2023. Tema yang dipilih adalah ***‘MEMPERKASA KESEJAHTERAAN AWAM KE ARAH SOSIO-EKONOMI YANG LEBIH RESILIEN’***. Tema ini akan memfokuskan kepada empat (4) keutamaan iaitu:-

- i. **Memelihara Kesejahteraan Awam;**
- ii. **Menjamin Sekuriti Makanan (*Food Security*);**
- iii. **Mendukung dan Membantu Sektor Swasta agar Berdayatahan dan Berkembang; dan**
- iv. **Meningkatkan Kompetensi Sumber Manusia Ke Arah *Work and Future-Ready*.**

30. Tema ini dirangka bagi memastikan usaha-usaha yang telah dilaksanakan dan dirancang untuk diteruskan dan dilipatgandakan dalam usaha mengukuhkan lagi kedayatahan sosio-ekonomi Negara agar ianya mampan dan inklusif dengan memanfaatkan *competitive advantage* yang sedia ada dan teknologi yang inovatif. Ini adalah termasuk meningkatkan produktiviti pengusaha mikro, kecil dan sederhana (PMKS) dan sekaligus menjana peluang pekerjaan bagi anak-anak tempatan.

Yang Berhormat Yang Di-Pertua Dewan, kaola akan menghuraikan secara ringkas keutamaan-keutamaan berkenaan satu persatu termasuk perkembangan dan pencapaian nya;

PERTAMA; MEMELIHARA KESEJAHTERAAN AWAM,

31. Kerajaan akan terus mendukung ke arah pemulihan ekonomi Negara yang terkesan daripada pandemik COVID-19. Ini termasuklah memberikan keutamaan terhadap penjagaan kesihatan awam yang menyeluruh dan komprehensif. Ke arah ini, peruntukan-peruntukan adalah disediakan seperti berikut:

31.1 Sejumlah \$124.52 juta untuk menangani penularan wabak COVID-19, termasuk menambah bekalan vaksin-vaksin COVID-19; menambahbaik kapasiti sistem Aplikasi BruHealth; pembelian peralatan perubatan serta barang guna habis termasuk Antigen Rapid Test, keperluan di pusat-pusat pengasingan dan ujian makmal-makmal COVID-19; meneruskan pemberian Elaun Khas kepada para barisan hadapan; dan sebagainya;

31.2 Sejumlah \$55 juta untuk membeli ubat-ubatan; dan sejumlah \$41.5 juta bagi Perbekalan dan Perkhidmatan Perubatan.

31.3 Sejumlah \$1.9 juta, dengan Harga Rancangan \$5.6 juta di bawah RKN ke-11, seperti projek-projek Pembinaan Blok Baru Pusat Kesihatan Jubli Perak, Sengkurong dan Pembinaan Bangunan Perkhidmatan Kecemasan Hospital Suri Seri Begawan Kuala Belait; dan

31.4 Sejumlah \$30 juta di bawah Perkhidmatan Rampaian, Kementerian Kewangan dan Ekonomi untuk membayar Perkhidmatan Perubatan Rawatan di JPMC, Pusat Kanser Brunei dan Brunei Neuroscience, Stroke & Rehabilitation Centre.

32. Alhamdulillah, pada menjunjung titah perkenan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, pindaan ke atas Perintah Akta Pencen Umur Tua dan Kurang Upaya (Pindaan), 2021; dan Perintah Orang Kurang Upaya (OKU), 2021, yang memberi kesaksamaan hak asasi dan peluang penyertaan penuh dalam masyarakat bagi golongan yang berkelainan upaya dan mengukuhkan penjagaan dan pemedulian

golongan OKU termasuk pemberian elaun kepada yang benar-benar layak.

33. Bagi mensejajarkan proses pemberian bantuan-bantuan oleh agensi-agensi berkenaan dan memastikan tidak ada ketirisan kepada golongan-golongan yang berhak menerima bantuan, Kerajaan telah memperluaskan kapasiti Sistem Kebajikan Negara (SKN) bagi membolehkan pemohon-pemohon dari sektor swasta dan individu yang bekerja sendiri (*self-employed* atau *freelance*) yang telah terkesan oleh pandemik COVID-19 untuk mendapatkan bantuan-bantuan yang diperlukan.
34. Untuk meningkatkan keselesaan dan keselamatan kanak-kanak yang memerlukan perlindungan, sejumlah \$200 ribu dengan Harga Rancangan \$1.8 juta di bawah RKN ke-11 disediakan untuk membina Bangunan Baru Unit Perlindungan, Komplek Rumah Kebajikan, di bawah Kementerian Kebudayaan, Belia dan Sukan.
35. Untuk meningkatkan kesejahteraan dan kebajikan golongan yang kurang berkemampuan, Program Pembinaan Rumah Bantuan bagi Golongan Daif, Fakir dan Miskin akan diteruskan melalui peruntukan Kumpulan Wang Zakat Majlis Ugama Islam Brunei (MUIB); bantuan perumahan di bawah Jabatan

Pembangunan Masyarakat (JAPEM), Kementerian Kebudayaan, Belia dan Sukan dan Yayasan Sultan Haji Hassanah Bolkiah.

36. Untuk memelihara kebajikan rakyat melalui pemilikan rumah (*home ownership*), peruntukan sejumlah \$38.8 juta dengan Harga Rancangan \$250 juta di bawah RKN Ke-11 adalah bagi projek pembinaan rumah kediaman di bawah Rancangan Perumahan Negara di Kampong Lugu dan Kampong Tanah Jambu.
37. Untuk meningkatkan kualiti bekalan air di Negara ini, peruntukan sejumlah \$26.1 juta dengan Harga Rancangan \$216.0 juta di bawah RKN Ke-11, khususnya bagi Kementerian Pembangunan melaksanakan kerja-kerja pembinaan, penaiktarafan dan penggantian aset-aset perbekalan air.
38. Untuk memastikan perkhidmatan elektrik yang *reliable* dan berkualiti, sejumlah \$44 juta dengan Harga Rancangan \$315.7 juta di bawah RKN Ke-11 adalah bagi membiayai kerja-kerja penaiktarafan dan penyelenggaraan infrastruktur elektrik.
39. Untuk meningkatkan *connectivity* dan membuka peluang perkembangan aktiviti sosioekonomi, sejumlah \$20.2 juta dengan Harga Rancangan \$1,169.5 juta disediakan di bawah

RKN Ke-11 adalah khusus untuk meneruskan kerja-kerja penambahbaikan, pemeliharaan dan peningkatan rangkaian jalan raya.

40. Ke arah usaha untuk menangani impak perubahan iklim sejumlah \$15 juta disediakan bagi pengurusan bencana alam seperti kejadian banjir, tanah susur dan sebagainya; dan sejumlah \$5.5 juta dengan Harga Rancangan \$60.3 juta di bawah RKN Ke-11 disediakan untuk melaksanakan beberapa projek mitigasi banjir.
41. Untuk memelihara kesejahteraan dan kebajikan Penjawat Awam, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah memperkenankan bagi kakitangan di dalam Perkhidmatan Open Vote dan Gaji Hari dalam Bahagian IV dan V yang memenuhi syarat untuk diserapkan ke dalam perkhidmatan tetap dan akan menerima semua kemudahan-kemudahan di bawah perkhidmatan tetap berkenaan. Mulai Tahun Kewangan 2022/2023, peruntukan untuk pekerja Open Vote dan Gaji Hari telah disediakan sejumlah \$107.63 juta di bawah Gaji Kakitangan.

Yang Berhormat Yang Di-Pertua Dewan dan Ahli-Ahli Yang Berhormat,

42. Kaola menjunjung kasih di atas kurnia Titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam di **Majlis Pembukaan Persidangan Musim Permesyuaratan Ke Lapan Belas Majlis Mesyuarat Negara 2022 pada 24 haribulan Februari 2022** **iaitu** berkaitan dengan *Skim Tabung Amanah Pekerja (TAP)*, dimana kajian telahpun selesai dibuat oleh Kementerian Kewangan dan Ekonomi dengan kerjasama Tabung Amanah Pekerja (TAP) dan In-Shaa Allah pelaksanaan penuh akan bermula pada tahun 2023. Dalam pada itu, Baginda juga menekankan bahawa segala persiapan sebelum pelaksanaan penuh dibuat hendaklah dilaksanakan dengan teratur antaranya pindaan kepada Akta, perubahan kepada sistem teknologi maklumat dan termasuklah pemberigaan. Apa yang penting mereka yang terlibat dalam skim ini nanti akan memahami berkenaan dengan skim persaraan baru yang dimaksudkan.
43. Untuk membantu tenaga-tenaga pengajar dan pelajar-pelajar yang kurang berkemampuan yang menerima Skim Miftaahun Najaah atau SMN di bawah Kementerian Pendidikan dan Kementerian Hal Ehwal Ugama semasa pelaksanaan inisiatif-inisiatif sesi pengajaran dalam talian (*Online Teaching*) dan sesi pembelajaran dari rumah (*Home-based Learning*),

Kerajaan telah menghulurkan bantuan-bantuan seperti berikut:

- 43.1 Dari bulan Oktober dan November 2021, bantuan berbentuk *monetary* sejumlah B\$20.00 sebulan bagi setiap tenaga pengajar. Manakala bagi pelajar pula, *data donation* yang dikumpulkan oleh syarikat-syarikat telekomunikasi telah digunakan untuk membantu pembelajaran sebanyak 10 Gigabyte setiap bulan. Manakala, pihak Kerajaan akan membayar *top-up* jika diperlukan tertakluk kepada tuntutan dari syarikat-syarikat telekomunikasi yang disahkan oleh Kementerian Pendidikan dan Kementerian Hal Ehwal Ugama.
- 43.2 Bagi Penggal Persekolahan Tahun 2022, Kerajaan telah menyewa peranti dari syarikat-syarikat telekomunikasi untuk digunakan oleh tenaga-tenaga pengajar dan pelajar-pelajar di bawah SMN.
- 43.3 Ke arah itu, sejumlah \$8.4 juta di bawah Perkhidmatan Rampaian Kementerian Kewangan dan Ekonomi adalah disediakan untuk membiayai Projek Pembekalan Komputer Riba dan Internet Data bagi Tenaga Pengajar dan Penuntut di bawah Kementerian

Pendidikan dan Kementerian Hal Ehwal Ugama khas untuk penuntut-penuntut di bawah Skim Miftaahun Najaah (SMN).

Yang Berhormat Yang Di-Pertua Dewan dan Ahli-Ahli Yang Berhormat,

KEUTAMAAN BELANJAWAN KEDUA ADALAH UNTUK MENJAMIN SEKURITI MAKANAN (*FOOD SECURITY*).

44. Kerajaan akan terus memastikan bahawa bekalan makanan di negara ini adalah sentiasa terjamin termasuk hasrat untuk mencapai sara diri dan mengurangkan kebergantungan kepada import semata-mata. Pada masa yang sama, Negara juga berdepan dengan cabaran inflasi global yang semakin meningkat iaitu termasuk inflasi bagi makanan.
45. Pada masa yang sama, Food and Agriculture Organisation (FAO) Global Food Price Index telah mencatatkan bahawa kadar inflasi makanan global pada bulan Januari 2022 adalah pada kadar 19.5 peratus tahun-ke-tahun berbanding dengan 3.2 peratus pada tahun 2020. Di antara penyebab utama kenaikan harga makanan di dunia ini adalah disebabkan oleh permintaan yang mendadak berikutan krisis di peringkat serantau dan global akibat bekalan yang terjejas di negara-

negara pembekal; peningkatan kos logistik dan pengangkutan berlipat ganda; kenaikan kos bahan mentah seperti benih dan baja; penutupan kilang-kilang pengeluar makanan disebabkan oleh pandemik dan keadaan cuaca ekstrim seperti musim kemarau atau hujan berterusan yang menjejaskan hasil penuaian di negara pembekal dan seterusnya mengurangkan kuantiti import.

Peningkatan kadar inflasi makanan global yang di luar kawalan negara ini tidak dapat dielakkan dan seterusnya memberi impak bukan sahaja kepada pengguna tetapi juga kepada pengusaha di negara ini.

46. Justeru itu, dengan mengambilkira kadar import makanan negara yang tinggi iaitu sebanyak 74 peratus, kadar inflasi yang tinggi dari pembekal-pembekal luar negara (*imported inflation*) telah menyumbang kepada kenaikan harga barangan di Negara ini. Kadar inflasi makanan di Negara ini bagi tahun 2021 adalah sebanyak 2.4 peratus. Oleh yang demikian, adalah mustahak bagi negara ini untuk terus memastikan bekalan makanan yang mencukupi dengan meningkatkan hasil keluaran makanan dalam negara, ke arah meningkatkan kadar sara-diri (*self-sufficiency*) dan mengurangkan kebergantungan kepada import.

47. Oleh itu, bagi memastikan bekalan makanan Negara adalah sentiasa terjamin termasuk untuk mencapai *self-sufficiency*, beberapa usaha telah dan sedang dilaksanakan dalam meningkatkan pengeluaran dari Sektor-Sektor Pertanian, Perikanan dan Ternakan.
48. Syarikat PaddyCo Sdn Bhd, dengan Projek Penanaman Padi Kandol, telah berjaya mengembangkan keluasan ladang padi dari 8.23 hektar pada tahun 2019 kepada 48 hektar pada bulan November 2021 dan akan diperluaskan seterusnya sehingga 173 hektar pada penghujung tahun ini.

Ke arah itu, sejumlah \$10 juta dengan Harga Rancangan \$46 juta terus disediakan bagi Projek Penanaman Padi Fasa Kedua di Kawasan Kandol, Daerah Belait yang dijangka siap pada tahun 2026 dengan keluasan 500 hektar yang berpotensi untuk menyumbang sebanyak 11 hingga 15 peratus tahap sara diri, Insya Allah.

Di samping itu, sejumlah \$9 juta juga disediakan di bawah Skim Pembelian Semula Padi termasuk bagi pembelian benih-benih padi *hybrid* bagi kegunaan peladang-peladang.

49. Ke arah mendukung usaha untuk meningkatkan produktiviti dan pengeluaran industri akuakultur, sejumlah \$1.9 juta

dengan Harga Rancangan \$3.8 juta disediakan di bawah RKN Ke-11 iaitu bagi memajukan dan membuka tapak-tapak industri akuakultur; melaksanakan 'Program Perkembangan Genetik dan Pembiakan Selektif Ikan bagi Meningkatkan Produktiviti Industri Akuakultur'; 'Industri Ternakan Udang Fasa IV' dan 'Program Meningkatkan Pengeluaran Industri Akuakultur'.

50. Bagi meningkatkan pengeluaran dan kualiti di sektor perikanan, beberapa syarikat usahasama telah ditubuhkan antarlainnya seperti berikut:

50.1 Syarikat Blue Ocean Tech Sendirian Berhad yang mengendalikan projek penetasan dan pembiakan udang biru rostris di Pusat Perkembangan Induk Serasa.

50.2 Syarikat Jets Sendirian Berhad yang mengendalikan projek ladang penternakan udang biru rostris di Sungai Paku, Telisai, Tutong dan tapak ternakan laut di Tapak Akuakultur Pelumpong.

50.3 Syarikat Lianfeng Investment Sendirian Berhad yang mengendalikan pemerosesan udang biru rostris dan makanan laut di Kompleks Pendaratan Ikan Muara.

50.4 Syarikat Barramundi Asia (B) Sendirian Berhad telah mula beroperasi pada suku kedua tahun 2021 di sebuah tapak penternakan anak-anak ikan (*fingerlings*) di darat yang menggunakan teknologi Recirculating Aquaculture System di Broodstock Development Centre, Serasa dan sebuah tapak ternakan ikan *juveniles* laut di Tapak Akuakultur Pelumpong. Insyallah, Syarikat ini berpotensi untuk menghasilkan ikan barramundi dengan kapasiti tahunan sebanyak 3,000 tan selepas tahun 2026.

50.5 Syarikat Golden Corporation Sendirian Berhad telah membuat pengeluaran berjumlah 4,200 tan udang putih species *Vanamie* daripada penuaian yang dibuat pada tahun 2021. Ini merupakan kenaikan sebanyak 150 peratus dari tahun 2020. Setakat ini, sejumlah 156 kontena udang putih telah dibekalkan bagi pasaran eksport.

51. Untuk mendukung peningkatan keluaran sayur-sayuran dengan menggunakan teknologi, teknik moden dan untuk membantu meningkatkan produktiviti, sejumlah \$5 juta dengan Harga Rancangan \$30 juta telah disediakan.

52. Manakala, di bawah Sektor Ternakan, sejumlah \$3 juta dengan Harga Rancangan sejumlah \$26 juta di bawah RKN Ke-11 adalah disediakan untuk membiayai Rancangan Pembangunan Industri Ternakan bagi Menjana Pengeluaran.
53. Berikutan daripada impak pandemik COVID-19, Syarikat PDS Abattoir Sdn Bhd telahpun bekerjasama dengan Kementerian Sumber-Sumber Utama dan Pelancongan dalam memastikan jaminan makanan (*food security*) khususnya bekalan daging di Negara ini adalah mencukupi dan stabil mengikut permintaan pasaran tempatan. Sepanjang tahun 2021, Syarikat PDS Abattoir telah mengimport sebanyak 13,885 ekor lembu dan 5,681 ekor kambing yang sedia untuk disembelih bagi menampung kekurangan bekalan daging di Negara ini.
54. Ke arah memastikan keselamatan dan kualiti makanan di Negara ini, Alhamdulillah, Autoriti Makanan Brunei Darussalam atau Brunei Darussalam Food Authority (BDFA) telah ditubuhkan pada 1 haribulan Januari 2021, sebagai *competent authority* yang bertujuan mendukung fungsi dan peranan BDFA seperti Perintah Daging Segar (2011) (Pindaan) (2020) dan Peraturan Kesihatan Awam (Makanan), Penggal 182 (Pindaan) (2020) dan beberapa perundangan dan peraturan baru juga sedang digubal untuk mengukuhkan lagi isu keselamatan dan kualiti makanan di Negara ini. Di peringkat operasi, BDFA menjalankan aktiviti rutin untuk

memastikan makanan yang diimport ke Negara Brunei Darussalam memenuhi keperluan keselamatan makanan, antaranya seperti ujian mikrobiologi dan kimia bagi konsainan daging yang diimport sebelum diberikan kebenaran untuk dijual serta pengesahan keselamatan bagi makanan proses yang diimport. BDFA juga membantu memudahcara perkembangan industri makanan tempatan ke arah memenuhi keperluan pasaran eksport, melalui pemeriksaan premis pemprosesan dan pengeluaran pensijilan yang diperlukan seperti Sijil Kesihatan Eksport, Sijil Penjualan Bebas bagi barangan makanan berproses, serta Pengisytiharan Bebas Dari Lemak Haiwan mulai pada 1 haribulan Oktober 2021.

55. Bagi menangani isu inflasi makanan di Negara ini, Jabatan Perancangan Ekonomi dan Statistik (JPES) sedang giat melaksanakan pemantauan dan penguatkuasaan harga barangan tertentu. Beberapa pindaan juga telah dibuat ke atas *Price Control Act (Amendment) Order, 2021* Penggal 142, *Price Control (Maximum Prices and Charges) (Amendment) Order, 2021*, dan *Price Control (Minimum Price and Charges) (Repeal) Order, 2021*. Pindaan ini antarlainnya, bertujuan untuk membolehkan maklumat-maklumat relevan diperolehi dari pihak peniaga bagi kerja pemantauan harga barangan asasi tertentu sebagai kegunaan input dasar dan

penguatkuasaan kawalan harga. Selain dari pengawalan harga secara berterusan bagi beberapa jenis makanan, JPES juga setiap minggu memuatnaik harga pasaran bagi lebih 100 produk-produk makanan dan bukan makanan di aplikasi Pengguna Bijak bagi membolehkan orang ramai membuat perbandingan harga.

Yang Berhormat Yang Di-Pertua Dewan dan Ahli-ahli Yang Berhormat,

FOKUS BELANJAWAN YANG KETIGA ADALAH UNTUK MENDUKUNG DAN MEMBANTU SEKTOR SWASTA AGAR BERDAYATAHAN DAN BERKEMBANG.

56. Berikutan dari tercetusnya gelombang kedua wabak COVID-19, Kerajaan akan terus memberi sokongan dan perhatian yang sewajarnya kepada premis-premis perniagaan dan pekerja-pekerja sektor swasta yang terkesan pada mana langkah-langkah yang telah dilaksanakan adalah seperti berikut:

56.1 Penangguhan Pembayaran (atau *deferment*) ke atas Caruman TAP dan SCP bagi Pekerja-Pekerja Tempatan yang berpendapatan \$1,500 sebulan dan ke bawah di sektor-sektor yang terjejas di dalam kategori

Perusahaan Mikro, Kecil dan Sederhana (PMKS) iaitu dengan jumlah pekerja yang tidak melebihi daripada 100 orang mulai 1 haribulan Ogos 2021 sehingga 31 haribulan Disember 2021.

56.2 Pemberian subsidi pembayaran gaji sebanyak 25 peratus kepada pekerja tempatan di bawah Perusahaan Mikro, Kecil dan Sederhana (PMKS) yang mempunyai pekerja yang tidak melebihi daripada 100 orang mulai 1 haribulan Ogos sehingga 31 haribulan Disember 2021.

56.3 Pembiayaan caruman SCP kepada golongan yang bekerja sendiri mulai Ogos 2021 sehingga Disember 2021 bagi membantu mereka yang berkerja sendiri yang terkesan dari wabak ini serta memastikan mereka akan mempunyai perlindungan *Survivorship Fund* yang berterusan.

56.4 Bantuan berupa kewangan bermula 1 haribulan September 2021 bagi tempoh 3 bulan telah diberikan kepada tiga golongan pekerja di Sektor Swasta yang terkesan disebabkan oleh COVID 19 iaitu (1) Mereka yang kehilangan pekerjaan; (2) Mereka yang dicutikan

tanpa gaji melebihi 7 hari; dan (3) Mereka yang berkerja sendiri (*self-employed* atau *freelance*).

- 56.5 Memberikan diskaun sekurang-kurangnya 30 peratus ke atas kadar sewa bangunan Kerajaan kepada PMKS mengikut perusahaan yang terjejas. Ini adalah untuk membantu mengurangkan kos operasi kepada pengusaha-pengusaha yang dimaksudkan.
- 56.6 Memberikan *tax discount* sebanyak 50 peratus ke atas cukai pendapatan korporat bagi tahun taksiran 2022 kepada sektor yang terjejas.
- 56.7 Memberikan 20 peratus diskaun untuk bil-bil air dan elektrik ke atas syarikat-syarikat yang terjejas.
- 56.8 Pengecualian sementara duti kastam dan duti eksais bagi produk-produk *Personal Hygiene* sehingga 31 haribulan Disember 2021.
- 56.9 Pemberian pengurangan cukai bangunan semasa dan tahunan maksima sebanyak 50 peratus bagi tempoh 5 bulan bermula 1 haribulan Ogos 2021 hingga 31 haribulan Disember 2021 kepada pemilik bangunan yang mengurangkan sewa bulanan kepada penyewa,

di bawah kawalan Lembaga Bandaran Bandar Seri Begawan, Lembaga Bandaran Kuala Belait dan Seria dan Lembaga Bandaran Tutong.

57. Untuk membantu mengembangkan Perusahaan Mikro, Kecil dan Sederhana (PMKS), beberapa inisiatif telah dilaksanakan seperti berikut:

57.1 Program Industry Business Academy, Accelerate dan Micro Bootcamp yang dianjurkan oleh Darussalam Enterprise akan diteruskan dengan memberikan latihan keusahawanan kepada lebih 10 ribu peserta. Alhamdulillah, program ini telah berjaya menjana sekitar 241 startups dan 956 pekerjaan, berbanding 609 pekerjaan pada tahun 2020. Melalui program tersebut, *angel investors* tempatan dan serantau juga telah melabur secara kolektif sebanyak \$2.2 juta kepada 23 buah startups. Seterusnya, Darussalam Enterprise juga membantu sebanyak 31 buah syarikat untuk mendapatkan pensijilan piawaian antarabangsa dan 7 buah syarikat untuk mengeksport produk/perkhidmatan masing-masing ke pasaran luar negara. Sebanyak 199 buah syarikat telah menjalani latihan berkaitan standards.

57.2 Program Keusahawanan Runcit, yang dilancarkan pada 6 haribulan April 2021 oleh Syarikat Ghanim International Corporation Sendirian Berhad., iaitu sebuah syarikat di bawah Darussalam Assets Sendirian Berhad, merupakan inisiatif Kerajaan untuk mendorong penyertaan tempatan dalam industri runcit dan memberi laluan bagi produk-produk Perusahaan Mikro, Kecil dan Sederhana (PMKS) mencapai pasaran. Syarikat Ghanim juga bertindak sebagai fasilitator untuk mempromosikan usahawan muda tempatan sebagai pengurus dalam menjalankan *franchise* 'The Junction'. Program tersebut beroperasi di Kawasan Perumahan Armada Tungku Estate, di bangunan Bank Islam Brunei Darussalam (BIBD) Connect Kampong Perpindahan Lambak Kanan dan di Dewan Kemasyarakatan Mukim Mentiri yang mana setakat ini, seramai 3 usahawan muda tempatan telah layak mengikuti program tersebut.

57.3 Menyentuh mengenai Program i-Usahawan yang telah diperkenalkan pada 1 haribulan Ogos 2018 lalu, sebanyak 39 kontrak di dalam Sektor Tenaga telah dikenalpasti, di mana 22 kontrak daripadanya telahpun dianugerahkan kepada 34 pengusaha-pengusaha belia dengan anggaran nilai kontrak berjumlah \$30 juta.

Pengusaha-pengusaha belia berkenaan juga telah berjaya menjana 317 peluang pekerjaan kepada anak-anak tempatan.

57.4 Souq Al Qud-wah adalah inisiatif Bank Islam Brunei Darussalam (BIBD) dengan kerjasama Kementerian Hal Ehwal Ugama untuk mengembangkan kemahiran keusahawanan muallaf dan asnaf yang terdaftar di bawah Pusat Da'wah Islamiah. Program ini bertujuan untuk mewujudkan kesedaran, mempromosikan produk, menjana pendapatan, agar dapat berdikari dan bebas dari segi kewangan untuk memberhentikan kitaran kemiskinan dan mengurangkan pergantungan kepada bantuan zakat. Ekspo ini telah disertai oleh 23 buah vendor dan melibatkan penyertaan kira-kira seramai 100 orang.

58. Ke arah menggalakkan pertumbuhan sektor swasta atau industri-industri untuk menyumbang kepada kepelbagaian ekonomi, beberapa peruntukan telah disediakan antaranya:

58.1 Sektor Kemajuan Perusahaan dan Perindustrian Negara, sejumlah \$3.8 juta dengan Harga Rancangan \$20 juta disediakan di bawah RKN ke-11 bagi projek **'Pembinaan Jejambat di Persimpangan Lebuhraya**

**Muara-Tutong dan Penempatan Tapak Industri
Tanjong Kajar'; dan**

- 58.2 Ke arah meningkatkan pembangunan sektor swasta, sejumlah \$1 juta dengan Harga Rancangan \$5.4 juta di bawah RKN ke-11 disediakan untuk menambahbaik dan menaiktaraf utiliti asas di kawasan tapak-tapak perindustrian dan komersial.
59. Darussalam Enterprise juga memainkan peranan dalam memperkembangkan Perusahaan Mikro, Kecil dan Sederhana (PMKS) disamping membantu menyediakan infrastruktur asas ditapak-tapak industri di bawah pihak berkenaan. Ke arah itu, pihak Darussalam Enterprise telah memperuntukkan sebanyak \$23 Juta Dollar Brunei bagi projek penambahbaikan dan menaiktaraf infrastruktur-infrastruktur di tapak-tapak industri yang telah dikenalpasti dan dijangka bermula pada Mac 2022 untuk tempoh 2 tahun.
60. Sepertimana yang kita sedia maklum, pandemik COVID-19 telah mempercepatkan proses transformasi digital dengan menekankan kepentingan kepada industri-industri termasuk masyarakat untuk dilengkapi dengan kemahiran dan pengetahuan yang sesuai dengan peralihan dalam era

ekonomi digital. Oleh itu, antara usaha-usaha untuk mendukung keutamaan ini termasuklah:

- 60.1 Pelancaran Sistem Pengurusan Sumber Manusia (SSM)
Jabatan Perdana Menteri telah diintegrasikan dengan sistem e-Payroll Kerajaan di Kementerian Kewangan dan Ekonomi.
- 60.2 Perlaksanaan Sistem Exit and Entry System (EES)
Jabatan Kastam dan Eksais Diraja telah berjaya mengutip sebanyak \$945 ribu Dollar Brunei bermula Oktober 2020 hingga Januari 2022;
- 60.3 One Common Billing System (OCBS), Jabatan Perbendaharaan yang mula digunakan pada bulan Januari 2020 dan telah dilaratkan penggunaannya di beberapa Jabatan-Jabatan Kerajaan. Penggunaan OCBS juga telah dilaratkan secara *partial* bagi Jabatan Kehakiman Negara, Bahagian Harta Intelektual Brunei Darussalam (BruIPO) di bawah Pejabat Peguam Negara, dan Kementerian Kesihatan bagi pembayaran COVID-19 *swab test* dan caj clinic melalui aplikasi BruHealth, yang mana Jabatan berkenaan hanya menggunakan kaedah pembayaran atas talian melalui kad kredit atau debit.

60.4 Projek Sistem e-Census Jabatan Perancangan Ekonomi dan Statistik telah mendukung pengendalian Banci Penduduk dan Perumahan (BPP) 2021 secara atalian yang mana hasil Laporan Kiraan Awal Jumlah Penduduk Negara Brunei Darussalam juga telah digunakan oleh agensi Kerajaan seperti Kementerian Kesihatan bagi Program Vaksinasi Kebangsaan dalam menangani penularan wabak COVID-19; dan

60.5 ***Coding.bn*** dibawah inisiatif Authority for Info-Communications Technology atau AITI yang disokong oleh *Manpower Industry Steering Committee Working Group* untuk Sektor ICT untuk melatih calon belia tempatan dalam program *coding*, mengikut piawaian industri global.

61. Ke arah mendukung keutamaan di bawah Digital Economy Masterplan 2025, pihak UNN telah memperluaskan Program Rangkaian Single Radio Access Network (S-RAN) dengan pelaksanaan sebanyak 80 peratus liputan seluruh negara ini. Ini bermakna infrastruktur rangkaian adalah “5G-ready” dan bersedia untuk pelaksanaan 5G di masa hadapan nanti. Negara Brunei Darussalam juga telah memperbaiki kelajuan rangkaian *mobile* dan mencapai kedudukan pertama di

antara negara-negara ASEAN dan kedudukan 17 di seluruh dunia berdasarkan *Speedtest Global Index*. Di samping itu, berikutan penubuhan Pusat Defense Cyber pada bulan Ogos 2020, Alhamdulillah, UNN juga telah berjaya melancarkan perkhidmatan *Data Centre Co-location* bertaraf Tier 3 dan perkhidmatan *Cloud Hosting* pada akhir tahun 2021 selaras dengan inisiatif digital bagi menyokong Wawasan Brunei 2035.

62. Ke arah mendukung matlamat ini khususnya dalam memantapkan keberkesanan perkhidmatan Kerajaan dalam mendukung keperluan sektor swasta untuk mewujudkan persekitaran perniagaan yang lebih kondusif dan berkesan, beberapa peruntukan telah disediakan antaranya:

- 62.1 Sejumlah \$13.2 juta dengan Harga Rancangan \$75.9 juta di bawah Sektor Teknologi Maklumat dan Info-Komunikasi, dibawah RKN Ke-11 akan terus disediakan antaranya termasuk projek Sistem Pensijilan Halal; Platform Perkhidmatan Perniagaan Nasional; dan Cukai Bangunan Elektronik; dan

- 62.2 Sejumlah \$87.4 juta bagi Peruntukan Teknologi Maklumat di bawah Perbelanjaan Berulang-Ulang Kementerian-Kementerian secara keseluruhan bagi IT

Central Procurement dan lesen-lesen *software* semua Kementerian dan Jabatan.

63. Mengambil kira akan kepentingan untuk mempelbagaikan ekonomi Negara, Kerajaan juga akan terus menarik lebih banyak Pelaburan Langsung Asing (FDI) di samping menjana *spin-off* aktiviti perekonomian dari pelbagai aspek termasuk *knowledge and technology transfer*, peluang perniagaan kepada PMKS dan peluang-peluang pekerjaan kepada anak-anak tempatan. Setakat ini, terdapat beberapa buah projek FDI baru dalam fasa pelaksanaan yang dijangka mula beroperasi di antara tahun 2022 hingga tahun 2026.

64. Kerajaan juga akan terus mendukung usaha-usaha meningkatkan kerjasama ekonomi dengan rakan-rakan perdagangan antarabangsa dengan tujuan untuk meningkatkan peluang akses pasaran dan membuka lebih banyak rangkaian pasaran eksport bagi membantu perniagaan tempatan mengeksport ke pasaran luar Negara. Antara usaha-usaha yang telah dilaksanakan melalui penandatanganan perjanjian yang dimeterai termasuk:

64.1 Meratifikasi perjanjian Perkongsian Ekonomi Komprehensif Serantau atau Regional Comprehensive Economic Partnership (RCEP), iaitu Free Trade

Agreement yang terbesar di dunia, yang berkuatkuasa mulai 1 Januari 2022. Ianya dihasrat untuk dimanfaatkan dengan memperluaskan dan mengeratkan hubungan ekonomi di antara rakan-rakan RCEP; disamping memberi peluang baru untuk pengusaha-pengusaha dan peniaga-peniaga Negara Brunei Darussalam terutamanya dari segi akses pasaran dan peluang-peluang pelaburan. Bagi meningkatkan pemahaman mengenai peluang-peluang dan faedah yang boleh diraih dan juga kapasiti-kapasiti syarikat-syarikat tempatan di dalam penggunaan perjanjian RCEP ini, Kementerian Kewangan dan Ekonomi, insyaAllah, akan mengadakan sesi-sesi pemberigaaan dengan pihak swasta dalam masa yang terdekat ini.

64.2 Perjanjian Pengelakan Cukai Dua Kali dan Pencegahhan Pelarian Fiskal Berkenaan dengan Cukai-Cukai ke Atas Pendapatan iaitu *Agreement for the Avoidance of Double Taxation and the Prevention of Fiscal Evasion with respect to Taxes on Income* bersama Republik Filipina. Melalui perjanjian ini, kedua-dua negara akan dapat meningkatkan lagi kerjasama ekonomi, pelaburan dan perdagangan termasuk memudahkan pertukaran maklumat bagi isu-isu percukaian.

64.3 Dalam pada itu, kaola menyeru agar pengusaha-pengusaha tempatan dapat merebut peluang-peluang perniagaan dan pelaburan dengan terbukanya akses pasaran yang lebih besar ini melalui penandatanganan perjanjian-perjanjian ini.

65. Seterusnya, tumpuan juga akan terus diberikan dalam meningkatkan keupayaan perkhidmatan logistik dan pengangkutan bagi mendukung rantai bekalan barangan penting dan kritikal dapat diterima oleh pengguna dalam tempoh masa yang diperlukan dan dalam keadaan yang sempurna. Antara inisiatif yang telah dilaksanakan bagi mendukung usaha-usaha di bawah keutamaan ini termasuklah:

65.1 Penandatanganan di antara Brunei International Air Cargo Centre Sendirian Berhad (BIACC) bersama pihak Berkuasa Maritim dan Pelabuhan Brunei Darussalam (MPABD) bagi Perjanjian Penyewaan, Pengurusan, Operasi dan Penyelenggaraan Depot Kontena Darat (ICD), di Sungai Tujuh dan Kuala Lurah. Melalui penandatanganan tersebut, pelbagai perkhidmatan dan kemudahan pengendalian akan ditawarkan yang akan memberi faedah kepada pengendali dalam logistik juga

rantaian pengangkutan kedua-dua belah sempadan;
dan

65.2 Projek Pengembangan Pelabuhan Muara yang bermatlamat untuk menambah kapasiti terminal kontainer yang sedia ada daripada 220,000 TEUs setahun kepada 500,000 TEUs setahun menjelang tahun 2025. Kerja-kerja pembinaan, Insha-Allah, akan bermula pada suku tahun pertama tahun 2023. Projek ini adalah inisiatif dan komitmen pihak Muara Port Company Sendirian Berhad (MPC) untuk menjadikan Pelabuhan Muara sebagai hab antarabangsa yang betaraf dunia bagi memudahkan pertumbuhan industri pembuatan dan logistik di Negara ini.

Yang Berhormat Yang Di-Pertua Dewan dan Ahli-ahli Yang Berhormat,

FOKUS BELANJAWAN YANG KEEMPAT ADALAH MENINGKATKAN KOMPETENSI SUMBER MANUSIA KE ARAH *WORK AND FUTURE-READY*

66. Tumpuan adalah diberikan untuk memastikan sistem pendidikan Negara adalah sentiasa relevan agar generasi sekarang dan akan datang akan terus memiliki kemahiran

tinggi, fleksibel, inovatif, *future ready*, kreatif dan boleh disesuaikan ataupun *adaptable* sejajar dengan kepesatan kemajuan pelbagai bidang dalam pasaran pekerjaan tempatan khususnya di era Revolusi Industri Ke-4.

67. Sebagai usaha Kerajaan untuk meningkatkan lagi pertumbuhan ekonomi Negara melalui perkembangan PMKS tempatan dan menarik lebih banyak FDI, Kerajaan akan terus menyediakan kursus dan juga latihan melalui pelbagai agensi seperti Darussalam Enterprise, Manpower Planning and Employment Council dan Kementerian Pendidikan, termasuk latihan sambil kerja seperti program iReady bagi pekerja-pekerja tempatan untuk meningkatkan kapasiti diri dan memanfaatkan peluang-peluang pekerjaan baharu.
68. Selain itu, Manpower Planning and Employment Council ataupun MPEC melalui Sekretariat Tetap MPEC telah melaksanakan kajian berkenaan dengan *Manpower Forecasting* untuk memastikan program-program dan kursus-kursus yang dijalankan dan disediakan adalah selaras dengan keperluan industri khusus bagi Syarikat Pelaburan Langsung Asing.
69. Pada masa yang sama, Manpower Industry Steering Committee ataupun MISC juga telah ditubuhkan sebagai satu

platform untuk mendukung visi MPEC dalam pensejajaran perancangan tenaga manusia dengan kebolehpasaran anak tempatan untuk mendapatkan pekerjaan yang *sustainable* dan *gainful*. MISC akan menyelaras di antara industri, institusi pendidikan dan institusi latihan ke arah memenuhi permintaan industri serta memastikan bekalan sumber manusia yang mencukupi pada waktu yang tepat. Lima sektor yang sedang diteliti oleh MISC pada masa ini adalah sektor *Energy, Construction, Hospitality and Tourism, ICT* dan *Transportation and Logistics*.

70. MISC bersama Sekretariat MPEC telah mengumpulkan dan meneliti peluang pekerjaan (*critical occupations*) termasuk jenis dan jumlah pekerjaan yang sedia ada dan unjuran tenaga kerja 5 tahun ke hadapan dalam sektor masing-masing. *Critical Occupations* merupakan jenis-jenis jawatan yang banyak diperlukan oleh pihak industri dan ianya juga dikenalpasti sebagai jawatan-jawatan yang sesuai boleh diisikan oleh anak-anak tempatan. Di samping itu, *competency standards* ataupun *framework* serta kurikulum latihan bagi *critical occupations* yang telah dikenalpasti di sektor berkenaan akan dibentuk berdasarkan keperluan dan kehendak dari industri, serta menghasilkan beberapa program kemahiran baru untuk dilaksanakan.

71. Antara program-program yang telah dilaksanakan adalah seperti Program Dual *Technical and Vocational Education and Training (TVET)*; dan Architect - Mechanical & Electrical - Civil & Structural (ARMECS) Bridging Programme untuk memberikan latihan kemahiran selaras dengan keperluan industri Sektor Pembinaan.
72. Selain itu juga, kerjasama yang berterusan dengan kerjasama dari pihak Kementerian Pendidikan akan terus dijalankan. Ini adalah untuk memastikan pendidikan serta latihan kemahiran akan dapat dikemaskinikan dan disediakan samada oleh pihak institusi pengajian Kerajaan mahupun institusi Pengajian Swasta. Berkenaan dengan maklumat unjuran tenaga kerja serta kompetensi yang diperlukan, pihak Sekretariat MPEC akan juga terus bekerjasama dengan Kementerian Pendidikan untuk membolehkan penyediaan dan pengemaskinian kurikulum yang bersesuaian dalam memastikan latihan yang dijalankan membolehkan anak tempatan mengisi jawatan-jawatan yang telah dikenalpasti melalui unjuran berkenaan.
73. Sebagai tambahan melalui *upskilling* dan *reskilling program* seperti SkillsPlus ianya adalah diharap akan dapat membantu anak tempatan di dalam sedikit sebanyak mengurangkan

jurang yang diperlukan dalam melaksanakan sesebuah pekerjaan.

74. Sukacita Kaola mengongsikan beberapa inisiatif yang sedang dilaksanakan bagi mendukung usaha-usaha tersebut seperti berikut:

74.1 Penubuhan Fakulti Pertanian di Universiti Islam Sultan Sharif Ali (UNISSA) dimana peruntukan sejumlah \$9 juta akan disediakan di bawah Perkhidmatan Rampaian untuk membiayai penambahbaikan dan penaiktarafan bangunan Kampus UNISSA di Kampong Sinaut, Daerah Tutong;

74.2 Program Agro-teknologi yang ditawarkan oleh Universiti Teknologi Brunei (UTB) adalah untuk menyediakan pengetahuan yang diperlukan dalam bidang agro-bisnis dan teknologi tradisional serta pertanian moden.

74.3 Alhamdulillah, beberapa pencapaian signifikan telah dicapai oleh institusi-institusi pengajian tinggi antaranya:

74.3.1 UTB dianugerahkan *5-Plus Star* bagi kecemerlangan oleh QS;

74.3.2 UBD berada di kedudukan ke-69 di Asia mengikut Kedudukan Universiti QS Asia 2022 dan ke 250 pada kedudukan universiti dunia QS 2022; dan

74.3.3 UNISSA dianugerahkan Global Islamic Finance Award (GIFA) untuk kali ketiga berturut-turut.

75. Untuk meningkatkan peluang graduan-graduan mendapatkan pekerjaan, sejurus selepas menamatkan pengajian, beberapa inisiatif telah dilaksanakan seperti:

75.1 Penandatanganan perjanjian persefahaman di antara Unified National Networks Sdn Bhd (UNN) dan Institut Pendidikan Teknikal Brunei (IBTE) bagi Program Perantisan UNN. Sejak tahun 2020, UNN telah mengambil seramai 25 pelajar daripada IBTE dan Politeknik Brunei untuk menjalani program perantisan dan Alhamdulillah, kesemua mereka telah menamatkan program perantisan pada tahun 2021. Kohort baru akan bermula, insyaAllah, pada tahun 2023 selama setahun.

75.2 Syarikat Hengyi juga telah menawarkan skim-skim biasiswa dan latihan-latihan dalam perkhidmatan bagi kakitangan tempatan antaranya seperti berikut:

75.2.1 Seramai 138 penuntut dari UBD telah dianugerahkan biasiswa, iaitu peningkatan sebanyak 35 penuntut, dalam bidang Kejuruteraan Proses dan Kimia bersama UBD dan Universiti Zhejiang, yang mana program ini juga merangkumi latihan industri di kilang petrokimia Zhejiang Hengyi Petrochemical Co. Ltd. di Republik Rakyat China selama 6 bulan;

75.2.2 Seramai 241 penuntut dari Institut Pendidikan Teknikal Brunei (IBTE) telah dianugerahkan biasiswa dalam bidang Kejuruteraan Kimia dengan kerjasama Lanzhou Petrochemical Polytechnic College, Republik Rakyat China;

75.2.3 Seramai 242 penuntut dari Politeknik Brunei sedang mengikuti Level 5 Diploma di Lanzhou Petrochemical Polytechnic College (LPP) seperti *Laboratory Technology, Chemical Engineering, Chemical Equipment Technology, Power Plant and Power System, Storage and Transportation*

Technology, Thermal Power Plant Technology and Water Treatment Technology.

Penuntut-penuntut ini nanti akan ditawarkan pekerjaan dengan Syarikat Hengyi sebaik sahaja berjaya menamatkan pengajian. Setakat ini, seramai 111 graduan dari UBD dan IBTE telah mula bertugas dengan Syarikat Hengyi. Di samping itu, seramai 551 anak tempatan juga pada masa ini berkhidmat di Syarikat Hengyi dalam pelbagai peringkat jawatan.

76. Seterusnya, inisiatif-inisiatif lain yang dilaksanakan adalah seperti berikut:

76.1 Program Study in Professional Institution (SPIN) in Accountancy di bawah MPEC adalah hasil kerjasama dengan Kementerian Kewangan dan Ekonomi dan Brunei Darussalam Institute of Chartered Public Accountants (BICPA) yang bertujuan untuk mengembangkan dan meningkatkan kumpulan profesional yang khusus dalam sektor berkenaan. Pada masa ini, seramai 104 peserta telah dianugerahkan pembiayaan di bawah program ini, yang akan dibimbing oleh seramai 25 mentor *professional*; dan

- 76.2 Program Biasiswa Anak Yatim, yang diungkapkan bersama oleh Kementerian Kebudayaan, Belia dan Sukan dan Program BIBD ALAF, akan bermula pada tahun persekolahan 2022. Program tersebut dihasrat untuk menyokong inisiatif pendidikan sebagai satu cara utama untuk membasmi kitaran kemiskinan.
77. Oleh itu, untuk mempertingkatkan lagi usaha ke arah mendukung hasrat di bawah keutamaan ini, beberapa peruntukan telah disediakan untuk memperkasa kualiti dan pencapaian mutu pendidikan Negara, beberapa peruntukan akan terus disediakan seperti berikut:
- 77.1 Peruntukan Biasiswa disediakan sejumlah \$40.1 juta secara keseluruhan di bawah pengendalian Kementerian Pendidikan dan Kementerian Hal Ehwal Ugama bagi memberi peluang kepada pelajar-pelajar untuk mengikuti pengajian di institusi-institusi pengajian tinggi teratas di dunia;
- 77.2 Peruntukan Program Bantuan sejumlah \$1.5 juta akan terus disediakan bagi mengendalikan Skim Miftaahun-Najaah untuk meringankan beban para ibu bapa dan

penjaga yang kurang berkemampuan untuk membeli keperluan persekolahan pelajar-pelajar;

77.3 Peruntukan Perkhidmatan Pendidikan disediakan sebanyak \$47.0 juta bagi membiayai pengambilan pakar dan tenaga-tenaga pengajar termasuk CFbT bagi meningkatkan tahap pencapaian pelajar-pelajar di seluruh Negara;

77.4 Di bawah RKN Ke-11, peruntukan secara keseluruhannya berjumlah \$38 juta dengan Harga Rancangan \$235 juta akan terus disediakan bagi penyediaan infrastruktur Sekolah-Sekolah Rendah, Menengah dan Ugama serta Institusi Pengajian Tinggi.

77.5 Untuk membangun keupayaan dan kapasiti perkhidmatan awam, peruntukan sejumlah \$37.5 juta disediakan di bawah peruntukan Peningkatan Kemahiran dan Kapasiti di Kementerian-Kementerian.

78. Dalam usaha untuk meningkatkan perkembangan modal insan disamping memastikan kesediaan dan kesiapsiagaan ke arah transformasi digital dan inovasi, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah mengurniakan titah

perkenan iaitu sempena Hari Keputeraan Baginda yang ke-75 tahun pada 15 haribulan Julai 2021 bagi penubuhan Majlis Penyelidikan dan Kemajuan Teknologi dan Sains (Council for Research and The Advancement of Technology and Science - CREATES) di bawah Kementerian Pengangkutan dan Infokomunikasi sebagai platform baharu untuk mempromosikan aktiviti yang berkaitan dengan sains, teknologi dan inovasi sekaligus menyokong keseluruhan aktiviti penyelidikan dan pembangunan di Negara ini.

79. Selaras dengan usaha dalam memajukan kegiatan penyelidikan di negara ini, beberapa peruntukan telah disediakan antaranya sejumlah \$1.9 juta untuk membiayai projek-projek penyelidikan yang akan dilaksanakan oleh Institusi-institusi pengajian tinggi di bawah Kementerian Pendidikan. Selain daripada itu, sejumlah \$10.7 juta dengan Harga Rancangan \$66 juta juga disediakan di bawah Sektor Sains dan Teknologi, Penyelidikan dan Pembangunan dan Inovasi, RKN Ke-11.
80. Di samping peruntukan-peruntukan yang disediakan di atas, Kerajaan juga menyediakan peruntukan sejumlah \$27.5 juta di bawah Projek Fokus khusus untuk membiayai program atau projek yang menjurus kepada mendukung fokus belanjawan negara; dan sejumlah kira-kira \$108.7 juta di bawah Projek

Rampaian khusus bagi menampung pembiayaan atau pelaksanaan projek-projek yang tidak dijangkakan.

Yang Berhormat Yang Di-Pertua Dewan dan Ahli-Ahli Yang Berhormat,

81. Dalam keadaan ekonomi dunia yang masih dalam proses pemulihan dari COVID-19, Kerajaan akan terus melaksanakan inisiatif-inisiatif dan menyediakan perancangan pembangunan Negara yang dapat menjana pertumbuhan ekonomi dan menjamin kebajikan, kesejahteraan serta keselamatan rakyat dan penduduk Negara ini, sepertimana sebahagiannya yang telah kaola bentangkan sebentar tadi.
82. Dalam hubungan ini, Syarikat-Syarikat Berkaitan Kerajaan atau *Government-Linked Companies* (GLCs) juga memainkan peranan penting dalam mendukung fokus belanjawan khususnya dalam memperkukuhkan sektor swasta bagi menyumbang kepada perkembangan ekonomi Negara. Oleh itu, beberapa inisiatif Kerajaan telah dilaksanakan melalui penglibatan Syarikat Berkaitan Kerajaan (GLCs) dan usahasama dengan pelabur langsung asing (FDI). Melalui Darussalam Assets, GLC dipastikan dan dipantau mempunyai kod pelaksanaan tadbir urus korporat ataupun *corporate code of governance* yang sesuai, memastikan model komersial yang berdaya maju, *financial reporting* yang tepat

dan *risk management* yang berkesan. Melalui Strategic Development Capital, usahasama dengan FDI juga adalah penting kerana FDI bertindak sebagai rakan kongsi teknikal, menyediakan teknologi dan akses pasaran antarabangsa dan serantau bagi produk dan perkhidmatan. Inisiatif-inisiatif ini adalah bertujuan untuk menyediakan negara dengan peningkatan aktiviti ekonomi dan menyediakan perkhidmatan dan infrastruktur kepada negara dan rakyat serta memberikan peluang pekerjaan untuk anak-anak tempatan.

83. Kaola juga menyeru agar sektor awam dan sektor swasta untuk terus berganding bahu dalam meningkatkan lagi usaha-usaha mempelbagaikan aktiviti-aktiviti ekonomi; meningkatkan lagi pelaksanaan projek melalui *Public-Private Partnership*; dan meningkatkan usaha untuk menarik lebih banyak pelaburan langsung asing, agar dapat meningkatkan produktiviti negara dan membuka lebih banyak peluang-peluang pekerjaan bagi anak-anak tempatan. Usaha-usaha ini adalah penting bagi mengurangkan kebergantungan kepada Kerajaan demi kedayatahan fiskal Negara, agar kemakmuran dan kesejahteraan yang kita nikmati pada masa ini akan berterusan dan dapat dinikmati oleh generasi-generasi yang akan datang.

Yang Berhormat Yang Di-Pertua Dewan dan Ahli-Ahli Yang Berhormat,

84. Sebelum kaola mengakhiri pembentangan ini, marilah kita sama-sama berdoa agar Negara kita akan sentiasa maju, aman dan makmur di bawah kepimpinan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, dan dengan izin Allah Subhanahu Wata'ala jua akan sentiasa menjadi sebuah Negara Zikir dengan penuh keberkatan di bawah perlindungan Allah Subhanahu Wata'ala jua, Aamiin.
85. **Kaola mencadangkan supaya Rang Undang-Undang yang dibentangkan di hadapan kita ini disokong untuk dijadikan satu Undang-Undang Perbekalan Negara Yang Dikeluarkan Dari Peruntukan Kumpulanwang Yang Disatukan bagi maksud-maksud yang tertentu, sepanjang Tahun Kewangan 2022/2023.**
86. Sekian. Wabillahitaufik Wal-Hidayah, Wassalamualaikum Warahmatullahiwabarakatuh.